

Ақийда дарслари (229-дарс) Қиёмат қоим бўлишига далиллар



19:00 / 22.05.2023 2135

Аллоҳ таоло Қуръони Каримда қиёмат қоим бўлиши ҳақидаги хабарни турли услублар ила баён қилган. Бу улкан ҳақиқатни сиз билан биз бандаларига англатиш учун ажойиб ибора ва жумлаларни ишга солган. Уларда ўша кундан огоҳлантириш ҳам, унга ишора қилиш ҳам, ундан қўрқитиш ҳам, унинг улкан даҳшатлари васфи ҳам ва бошқа ҳолатлар ҳам бор. Келинг, ўша ояти карималардан баъзилари билан танишайлик.

Аллоҳ таоло Нисо сурасида қуйидагиларни айтади:

فِيهِ رَيْبٌ لَا الْقِيَمَةَ يَوْمَ إِلَى لِيَجْمَعَنَّكُمْ هُوَ إِلَّا إِلَهَ لَا إِلَهَ إِلَّا اللَّهُ

حَدِيثًا اللَّهُ مِنْ أَصْدَقُ وَمَنْ ٨٧

«Аллоҳ - Ундан ўзга илоҳ йўқ - у ҳақда ҳеч шубҳа йўқ қиёмат куни сизларни албатта жамлайдир. Ким Аллоҳдан кўра тўғрисўзроқдир?!» (87-оят).

Яъни ягона Аллоҳнинг Ўзигина бандаларининг ибодатига лойиқ Зотдир. Ким Аллоҳни ибодатга сазовор ягона Зот, деб эътиқод қилса ва ҳаёти давомида фақат Аллоҳнинг айтганини қилиб яшаса, Унинг кўрсатмасидан чиқмаса, тавҳидга амал қилган бўлади. Ҳамда қиёмат куни мукофотини олади. Ким бунга амал қилмаса, жазосини олади. Бунга шубҳа йўқ. Чунки

«Аллоҳ... у ҳақда ҳеч шубҳа йўқ қиёмат куни сизларни албатта жамлайдир».

Бу гап чин ҳақиқат. Чунки бу гап Аллоҳдан келмоқда.

«Ким Аллоҳдан кўра тўғрисўзроқдир?!»

Ҳеч ким!

Аллоҳ таоло Назиъат сурасида қуйидагиларни айтади:

إِلَىٰ ۞۴۳ ذِكْرِنَهَا مِنْ أَنْتَ فِيمَ ۞۴۲ مُرْسَهَا أَيَّانَ السَّاعَةِ عَنِ يَسْأَلُونَكَ

يَوْمَ كَانَهُمْ ۞۴۵ يَخْشَاهَا مِنْ مُنْذِرُ أَنْتَ إِنَّمَا ۞۴۴ مِنْهَا رَبِّكَ

۞۴۶ ضَحَاهَا أَوْ عَشِيَّةً إِلَّا يُلْبِثُوا لَمْ يَرَوْهَا

«Сендан Соат ҳақида: «Қачон бўлур?» деб сўрашади. Унинг зикрини сен қандай билардинг?! Унинг интиҳоси Роббинггагина хос. Албатта,

сен қўрқувчиларни ундан огоҳлантирувчисан, холос. Уни кўрган кунлари худди дунёда кечки пайт ёки чошгоҳдан бошқа турмаганга ўхшарлар» (42-46-оятлар).

Яъни эй Пайғамбарим, одамлар сендан «Қиёмат қачон бўлади?» деб сўрарлар.

Уларнинг бу саволи истехзо учундир. Улар, сен айтаётган қиёматинг бўладиган бўлса, бўла қолмайдими, қабилида савол бермоқдалар.

«Унинг зикрини сен қандай билардинг?!».

Яъни қиёмат қачон бўлишини сен билмайсан. Аллоҳнинг Ўзигагина хос бўлган нарсани сен қаёқдан ҳам билар эдинг.

«Унинг интиҳоси Роббинггагина хос».

Яъни қиёматнинг қачон бўлишини фақат Аллоҳнинг Ўзи билади, холос. Бошқа ҳеч ким билмайди.

«Албатта, сен қўрқувчиларни ундан огоҳлантирувчисан, холос».

Қачон бўлиш вақтини белгилаб берувчи эмассан. Сенга бу хусусда топширилган вазифа одамларни қиёмат бўлишидан огоҳлантириш, уларни ўша кунга тайёрланишга ундаш, холос.

«Уни кўрган кунлари худди дунёда кечки пайт ёки чошгоҳдан бошқа турмаганга ўхшарлар».

Яъни улар бу дунёда ғурурга кетиб юрган бўлишларига қарамай, қиёматнинг даҳшатидан бу дунёда кечирган ҳаётлари бир кун ҳам яшамаганга ўхшаб туюлади.

«Сунний ақийдалар» китоби асосида тайёрланди

Ушбу китоб Ўзбекистон Республикаси Вазирлар Маҳкамаси ҳузуридаги Дин ишлари бўйича қўмитанинг 2022 йил 22 июлдаги 03-07/5979-рақамли хулосаси асосида чоп этилган.